



SAOPĆENJE ZA JAVNOST

Osuđen zbog prijetnji novinaru Na portalima pisao prijetee poruke

(Brčko, 28.11.2024. godine)

Tužilaštvo Brčko distrikta BiH okončalo je postupak u predmetu protiv B. S. (56)* optuženog da je u januaru ove godine putem internetskih portala prijetio novinaru Mirzi Derviševiću. Zbog ugrožavanja sigurnosti Derviševića, njemu je nepravosnažno izrečena uslovna osuda, kojom mu je utvrđena kazna zatvora od 30 dana, koja neće biti izvršena ukoliko optuženi ne učini novo krivično djelo u roku od dvije godine.

Tužilaštvo Distrikta nedavno je podiglo optužnicu protiv B. S. zbog sumnje da je 14. januara 2024. godine, putem pisanih izjava na Internet portalima, a posredstvom svog Facebook profila uputio više ozbiljnih prijetnji uredniku Internet portala „Times.ba“. On se tereti da je nakon objave vijesti „Novinar Mirza Dervišević nakon napada za „Avaz“: Prijetio je da će me ubiti, ali ja ću nastaviti časno i pošteno obavljati svoj posao“, uputio Mirzi komentar sadržaja „Treba te ubiti dzukelo tebe i takve ko tebe mamu ti j... otkud tebi pravo da pises i lupas gluposti o cemu nemas pojma dobro si prosao jesi li vidio koliki je lola samo te je malo opomenuo a sledeci put citaceti dzanazu majmune bradati“. Usto, sumnja se da je, pošto je na Internet portalu „Brčanski forum“ objavljena vijest „Uhapšen napadač na novinara Mirzu Derviševića iz Brčkog“, uputio komentar sadržaja „Napadac je vec pusten odavno a taj bradati ljigavac i smrad sledeci put dobice metak jel nije mu prvi put“. Prijetnje su kod Derviševića izazvale osjećaj straha i bojazni za vlastitu sigurnost, jer je i ranije bio fizički napadnut od strane nepoznatih lica, zbog čega je podnio krivičnu prijavu nadležnim organima – zaključeno je u optužnici.

Intenzivno vođena i sveobuhvatna istraga okončana je 1. novembra, kada je Tužilaštvo protiv B. S. podiglo optužnicu za krivično djelo ugrožavanja sigurnosti (*iz člana 180 stav (1) Krivičnog zakona Brčko distrikta*). Po potvrđivanju optužnice, optuženi i Tužilaštvo zaključili su sporazum o priznanju krivice, nakon čega mu je sud izrekao uslovnu osudu. Njemu je utvrđena kazna zatvora od 30 dana, koja neće biti izvršena ukoliko ne učini novo krivično djelo u roku od dvije godine. Jednako kao i Tužilaštvo, optuženi presudu može pobijati žalbom, izuzev u dijelu koji se odnosi na krivičnu sankciju.

*Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.

GLAVNI TUŽILAC

ZEKERIJA MUJKANović